

67. Illius equi, postquam otio in *Sindhuis* ripa itineris lassitudinem levasent, humeros quatiebant, quibus croci florum fila adhærebant.

68. Ibi *Húnarum* mulierum genis pallorem induxerunt *RAGHUIS* facta, quæ fortitudinem ejus in maritis earum jam antea manifestaverant.

69. *Kámbojenses*, prælio ejus impetum sustinere non valentes, flexi sunt, æque ac *akshodhæ* arbores, elephantorum funibus cinctæ.

70. Illi ingentes divitiarum acervos cum equis nobilibus abundanter tamquam dona ad *Kosakæ* dominum attulerunt, superbiam suam reprimentes.

71. Tum ille, equis potens, ascendit montem, *DURGÆ* parentem, excitato metallorum pulvere altiorem quasi reddens ejus apicem.

72. Narravit militibus, leones in cavernis cubantes, pari robore præditos, vel exercitus strepitu audito, sine ullo timore capite retro verso circumspicere.

73. Adflabant eum in itinere venti, in *bhúrjis* arboribus strepentes, in arundine susurrantes atque *Gangæ* guttas apportantes.

74. Requiescebant milites in umbris *nameruum* arborum, considentes in saxis quorum superficies odorata erat moscho hinnuleorum, qui ibi conderant.

75. Herbæ, quæ in elephantorum, ad *saralas* arbores alligatorum vinculis tremulo splendore lucebant, duci illi noctu pro lucernis sine oleo erant.

76. *Devadarues* arbores in stationibus ab illo relictis, cortice funibus fisso, *Kirátis* elephantorum magnitudinem narrabant.

77. Ibi *RAGHUI* cum catervis montanis prælium erat acerbum, in quo sagittarum, hastarum, lapidumque concussu ignis eliciebatur.

78. Postquam sagittis suis *Utsavasanketenses* festis desistere coegerat, *Kinnaros* brachiorum suorum victoriæ laudes canere docuit.

79. His populis dona afferentibus, montis medullam cognovit rex, ut mons regis medullam.

80. *RAGHUS* cum ibi inconcussam gloriæ suæ copiam deposuisset, montis a *RÁVANA* sublevati pudorem excitans descendit.